

Front Cover

Back Cover

Title Page

Nga Mahi a te Hui O Te Hahi Maori

O Te Atirikonatanga o Te Waimate

I Te Pihopatanga o Akarana. I Huihui Ki Waiparera (Hokianga), I A Hanuere 14, 1875. Auckland:

William Atkin, Church and General Printer, High Street. 1875.

KO TE PIHOPA O AKARANA TE UPOKO.

NA MINITA.

NGA MANGAI REIMANA.

Ko te karakiatanga o tenei Hui, he Karakia whaka#. Kotahi tekau ma waru nga tangata i whakauria, a muri iho e ono tekau ma whitu nga tangata i tango i te Hapa a te Ariki—Nga hoa o te Pihopa i te tukunga o te Hapa Tapu, ko te Atirikona, ko Revs. Matiu Taupaki, Piripi Patiki, Renata W. Tangata, me Rupene Paerata. Ko te Ohaohatanga (£3 2s. 7d.) i tapiritia ki nga moni mo te Wharekarakia hou ki Waiparera.

I noho te Hui ki te Whare Karakia tawhito; a, ka oti te karangaranga e te Pihopa nga tangata o te Hui, ka kiia e ia he Hui e rite ana ki ta te Ture i whakatakoto ai. Ka mutu te inoi, ka tu a te Pihopa ka korero; ko enei nga korero.

E hoa ma, e nga Minita me nga Mangai Reimana, Tena Koutou. E hari ana ahau moku ka tae mai hei Upoko mo tenei nohoanga o te Hui o te Atirikonatanga o te Waimate. He hua no oka raruraru me aku mahi te tae tonu mai au ki nga Hui katoa. E ora ana taku ngakau i au ka kite nei i te tokomaha-tanga o koutou ki konei, e mahara ana hoki ahau he roa te whenua i takahia mai nei e etahi o koutou. He nui te pai o te mahi o nga iwi ki te whakaaro ki o ratou mangai reimana, ina hoki kua kohikohi moni a te Waimate, a Paihia, a Oruru, a Kaitaia, a Parengarenga, a Hokianga hei whakaea i a koutou mea e pau ana, ina haerere ki nga Hui. Ka rawe tenei hei taurira ma nga Pakeha. He tohu tenei e kake haere ana te whakaaro o nga tangata o tenei Atirikonatanga ki nga mea o te Whakapono.

Tenei ano nga take i kite ai ahau e neke ake ana nga mahi a te Hahi. Ko nga taitamariki e haere mai ana kia whakaukia i te mea e rite ana nga tau. Kotahi tekau ma whitu nga tangata i whakaukia i te ra o te Whakaaturanga ki te Kopuru. I haere mai tenei hunga i Parirau, 16 maero te tawhiti. Kotahi wiki i noho ai ratou ki a Rev. F. T. Peka, a nana ratou i whakaako. Ko Rev. P. Patiki e haerere ana ki Parirau, e 70 maero te mamao o reira ki Waiparera. Heoi ko tena hunga i whakaukia na he hua no tana mahi.

No Hanuere 11 i whakapuaretia ai e ahau he whare Karakia hou ki Taita (Kaihu). Ko Mere te ingoa o taua whare. Wahi iti kua tae nga moni a nga Maori ki te £300 mo taua whare Karakia. He hua tenei no te mahi o Rev. F. Koura ratou ko Revs. P. Patiki, ko F. T. Peka. Ka ora o tatou ngakau ina kite i a te Peka e whakahaere ana i te mahi a tona matua, a te Peka kaumatua.

Kua oti te whare minita ki Parengarenga, a meake a Rev. R. Paerata haere ki reira. E kake ana te kura o Pukepoto (Kaitaia) a kua karangatia e ahau nga tamariki tokowha o reira kia haere ki te kura o Tepene i Akarana kia tata ai ki au.

Kua oti tetahi wharekarakia pai ki te Touwai (Whangaroa) a e haere nei ahau ki te whaka# i etahi o nga tangata o reira. Ko enei nga mahi o te tau kua pahure nei, a, he mea tika kia whakapai atu tatou ki te Atua, kia whai ngakau hoki ki Tana mahi.

Tera pea e pera ano te pai o te tau kua timata nei. Ko a te Ratapu e haere ake nei ka whakarikonatia a Hare Peka ki te Waimate. He mahi honore, he mahi uaua tena ka tukua na ki a ia. He pai anake nga korero mona a ona kaiwhakaako i Akarana. Erua nga whare karakia hou meake nei whakaarahia ki Hokianga. Kua kohikohi nga Maori mo te kawae i te Rongopai ki nga tauwiwi; he tohu tenei, kei te mahara ano koutou ki nga wairua o te hunga kahore ano i whitingia e te maramatanga o te Ora. Na tenei hoki i matauria ai ehara ta tatou whakapono i te whakarite kau. Ki taku ake whakaaro e kake ngatahi ana te noho tika a te iwi me a ratou mahi ki te taha ki te Hahi.

E tukutukua tonutia mat ana nga tohu aroha o o koutou hoa i Ingarani; he moni tapiri mo nga tahua whangai minita; he mea mo roto i nga whare karakia, he aha noa, he aha noa. E tangi tahi ana ahau me te iwi o Ahipara mo te matenga o o ratou kai whakaako, ara o Rapata Wharawhara raua ko Inoka Tutangiara.

Ka hui nei tatou kia kororerero, kia whakarongo i nga whakaaro o ia tangata, o ia tangata ki tana mea i kite

ai kia tupu ai te mahi a te Hahi. Ekore tetahi tikanga i whakatakotoria e te Hui e whakatuturutia hei Ture ki te kahore e whakaaetia e te Pihopa. Te take i peneitia ai te tikanga, he mea kei rere ke nga tikanga o te Hui Maori i nga tikanga o te Hinota o te Pihopatanga o Akarana.

He Tikanga, he Whakaaro Hoki no Te Hui.

I. Mo Nga Tangata e Meinga ana Hei MINITA.

He whakaaro i kitea i roto i tenei Hui mo nga tangata e meinga ana hei Minita; kia whiriwhiria i roto i o ratou iwi ake. Ma tenei hoki e kakama ai nga tangata ki nga kohikohinga whangai Minita.

II. Mo Tetahi Kura Mo Nga KAI-WHAKAAKO.

Tenei hoki tetahi whakaaro i kitea i roto i tenei Hui; ko tetahi kura mo nga Kai-whakaako kia whakaturia ki te Atirikonatanga o te Waimate.

III. Mo Nga KURA RATAPU Mo Nga tamariki.

He whakahau tenei ki nga wahi katoa o tenei Atirikonatanga mo nga Kura tamariki i nga Ratapu kia tu tonu.

IV. KAUA Nga WHARE-KARAKIAE waiho hei KURARa Noa.

Ki te whakaaro o tenei Hui, e kore e tika kia waiho nga Whare-karakia hei Whare-kura i nga ra noa, engari me whaka-motuhake mo te Karakia anake. Na, ko nga Whare-karakia, na te Kawanatanga nei tetahi wahi, na nga Maori tetahi wahi, me whakahoki nga moni a te Kawanatanga, me whakatu ano i nga Whare-kura. Ehara tenei i te pei i nga tamariki i nga Kura, otira he mea kia motu ke te Whare-karakia, kia motu ke te Whare-kura.

V. KIA AROHA NGA TANGATA KI NGA MINITA INA HAEREERE.

Kia whai aroha nga tangata o tenei Atirikonatanga ki nga Minita ina haereere ki nga kainga, kia tukua noatia te hoiho me te kai-arahi.

VI. MO NGA PUKAPUKA KARAKIA.

Kia tonoa atu e te Atirikona ki nga Kai-tiaki o nga pukapuka, kia tukua mai he Rawiri, he Kawenata, he Paipera; a me hoatu ki nga Kai-karakia ma ratou e hoko atu ki te iwi.

VII. MO NGA MONI HAEREERE A NGA MANGAI REIMANA.

Kia whakaaro nga tangata o nga Pariha ki o ratou Mangai Reimana, ki te whakaea i nga moni e pau ana i a ratou e haereere ana ki nga Hui. Ko aua moni me tango i roto i nga kohikohi.

VIII. MO TE WHIRIWHIRINGA I NGA MANGAI REIMANA.

Hei a Nowema e haere ake nei ka whiriwhiri ai i nga Mangai Reimana e ia Pariha, e ia Pariha.

IX. TE KAINGA ME TE RA MO TENET AKE HUI.

Ki te Waimate te Hui o te Atirikonatanga i te tau 1876, hei te Wenerei, te 12 o Hanuere.

HE INOI MO TE HUI O TE HAH MAORI.

E te Atua kaha rawa, kua oti nei te whakakotahi e koe Tau hunga whiriwhiri katoa hei tinana mo Tau Tama, mo to matou Ariki, mo Ihu Karaiti: ki te huihui hoki O tangata ki tetahi wahi i runga i Tona ingoa, kei reira ano Koe: Kia anga mai to whakaaro atawhai ki tenei wahi o To Hahi, manaakitia mai hoki matou, te Pihopa, mo nga Minita, me nga Mangai o te iwi kua mine mai nei ki te rapa tikanga. Kia riro mai i a matou nga taonga

maha a Tou Wairua Tapu, ara, te mahara, te mohio, te kaha, te aroha, me te ata wkakaaro; kia whai tonu ai matou i roto i a matou mahi katoa ko Koe kia whakakororiatia, ko to pai o To iwi kia kake, ko Tou rangatiratanga kia whakanuia. Kei meatia tetahi mea e matou i runga i te tikanga totohe, i to whakapehapeha, i te matakū ranei i te tangata: kei he hoki a matou mahi i te whakaaro poka noa ake, i te hianga ranei o te tangata: engari kia ata whakatakotoria nga tikanga katoa e tupu pai ai To Hahi i roto i a matou; kia mahia ai e matou katoa nga mahi pai kua rite mai nei i a Koe hei mahinga ma matou; kia whakakotahitia ai matou katoa i roto i te whaka-pono, i te aroha; kia rite tahi ai hoki a matou whakaaro me o matou mangai te whakakororia i a Koe; ko Ihu Karaiti hoki to matou Ariki. *Amine.*

Ko Nga Kai Whakaako Enei o Te Atirikona-Tanga o Te Waimate.

Takiwa o te Waimate:—Atirikona E. B. Karaka.

Takiwa o Oruru:—Rev. R. W. Tangata.

Takiwa o Kaitaia:—Rev. J. Matiu.

Takiwa o Hokianga:—Rev. Piripi Patiki.

Takiwa o Paihia:—Rev. Matiu Taupaki.

Ko Nga Hohikohinga Enei I Te Atirikonatanga o Te Waimate I Te Tau1874.